

UDHËZIM
Nr.16, datë 25.8.2010

**PËR DISA SHITESA E NDRYSHIME NË UDHËZIMIN NR.1649, DATË 16.8.1999 “MBI
PLOTËSIMIN E DISA KUSHTEVE TË VEÇANTA NË TRANSPORTIN RRUGOR TË
UDHËTARËVE”, TË NDRYSHUAR**

Në mbështetje të pikës 4 të nenit 102 të Kushtetutës, nenit 9 dhe paragrafit të parë të nenit 36 të ligjit nr.8308, datë 18.3.1998 “Për transportet rrugore”, të ndryshuar dhe të pikës 3 të nenit 236 të vendimit të Këshillit të Ministrave nr.153, datë 7.4.2000 “Rregullorja në zbatim të Kodit Rrugor”, të ndryshuar, Ministri i Punëve Publike dhe Transportit

UDHËZON:

Në udhëzimin nr.1649, datë 16.8.1999 “Mbi plotësimin e disa kushteve të veçanta në transportin rrugor të udhëtarëve”, të ndryshuar, të Ministrit të Punëve Publike dhe Transportit, bëhen këto shtesa e ndryshime:

Neni 1

I. Në kapitullin III bëhen këto shtesa e ndryshme:

1. Pas togfjalëshit “këshillit të bashkisë” ose “këshillit bashkiak” shtohet togfjalëshi “ose të komunës”.

2. Pas fjalës “bashkisë” ose “bashkitë” shtohet togfjalëshi “ose komunës”.

3. Në fund të paragrafit të dytë të pikës 2, shtohet një paragraf tjetër me përmbajtjen si vijon më poshtë:

“Nuk lejohet qëndrimi i një autoveture në shërbimin taksi e licencuar në një njësi të qeverisjes vendore, në vendin e qëndrimit të autoveturave në shërbimin taksi të një njësie tjetër të qeverisjes vendore.”.

II. Në kapitullin IV bëhen këto shtesa e ndryshime:

1. Pika 2 riformulohet si vijon më poshtë:

“2. Për sa i përket pamjes së jashtme:

a) të kenë si rregull ngjyrën e verdhë ose ngjyrën, ose kombinimin e ngjyrave të përcaktuara nga bashkia, ku subjekti është licencuar në shërbimin taksi;

b) në ndryshim nga shkronja “a” e kësaj pike, autoveturat në shërbimin taksi të licencuara nga bashkitë jo-qendër rrethi/komuna nuk duhet të kenë ngjyrën e verdhë; dhe

c) autoveturat në shërbimin taksi të licencuara në bashkitë jo-qendër rrethi/komuna nuk duhet të kenë ngjyrën ose kombinimin e ngjyrave të njëjta me ngjyrën e autoveturave të licencuara në shërbimin taksi nga bashkitë qendër rrethi të të njëjtit rreth.”.

2. Pas pikës 2 shtohet pika 2/1 me përmbajtje si vijon më poshtë:

“2/1 Autoveturat në shërbimin taksi në dyert anësore, përveç stampimit të fjalës “Taksi”, të kenë të vendosura, në mënyrë të dallueshme, tarifat në shërbimin taksi stemën e bashkisë/komunës, si dhe emërtimin e kodit, së bashku me numrin e serisë së licencës së bashkisë, ku subjekti taksi është licencuar në shërbimin taksi.”.

3. Pika 9 riformulohet si vijon më poshtë:

“9 a) Komisioni i DPSHTRR-së, në plotësimin e kushteve të komoditetit dhe të veçanta, pas verifikimit në plotësimin e kushteve të këtij kapitulli “Kushte të veçanta të automjetit në shërbimin taksi “TAKSI”, lëshojnë për autoveturën në shërbimin taksi dokumentin në përputhje me aneksin 3 të këtij udhëzimi. Aktvlerësimi i kushteve në shërbimin taksi për autoveturën në shërbimin taksi lëshohet çdo vit pasi autovetura ka kaluar kontrollin teknik periodik dhe vjetor dhe është pajisur me certifikatën e kontrollit teknik të mjeteve rrugore në përputhje me udhëzimin nr.2 datë 11.3.2010 “Mbi kontrollin teknik të mjeteve rrugore”.

b) Komisioni i DPSHTRR-së, në plotësimin e kushteve të komoditetit dhe të veçanta, nuk

kryhen veprime lidhur me plotësimin e dokumentit sipas aneksit 3 të këtij udhëzimi, nëse një autoveturë e shërbimit taksi e licencuar në bashki jo-qendër rrethi/komunë ka ngjyrë të verdhë ose ngjyrën, ose kombinimin e ngjyrave të njëjta, me autoveturat e licencuara në shërbimin taksi në bashkinë qendër rrethi, si dhe kur nuk plotëson dispozitat e pikës 3 të nenit 236 të vendimit të Këshillit të Ministrave nr.153 “Rregullorja në zbatim të Kodit Rrugor të Republikës së Shqipërisë”, të ndryshuar dhe kapitullit IV të udhëzimit.

c) Aktivlerësimi i kushteve të komoditetit dhe të veçanta në shërbimin taksi është pjesë përbërëse e procedurës së licencimit. Ky dokument mund të pezullohet ose të hiqet gjatë ushtrimit të veprimtarisë dhe, ose refuzohet lëshimi i tij nga komisioni i DPSHTRR-së, derisa këto kushte të jenë plotësuar.

ç) Subjekti i autorizuar nga Ministria e Punëve Publike dhe Transportit për kontrollin teknik të automjeteve nuk kryen veprime nëse një autoveturë e shërbimit taksi e licencuar në bashki jo-qendër rrethi/komunë ose një autoveturë në përdorimin privat, e cila ka ngjyrë të verdhë ose ngjyrën, ose kombinim të ngjyrave të njëjta me autoveturat e licencuara në shërbimin taksi në bashkinë qendër rrethi të të njëjtit rreth.

d) Bashkitë jo-qendër rrethi/komuna nuk licencojnë subjekte në shërbimin taksi, nëse autoveturat në shërbimin taksi në bashkitë jo-qendër rrethi/komuna kanë ngjyrë të verdhë ose ngjyrën, ose kombinimin e ngjyrave të njëjta me autoveturat në shërbimin taksi bashki qendër rrethi të të njëjtit rreth.”.

4. Pas pikës 9 shtohet pika 9/1 me përmbajtjen, si vijon më poshtë:

“9/1 Nëse një autoveturë në shërbimin taksi nuk përdoret më për qëllime të destinacionit të saj, ajo nuk lejohet të përdoret si autoveturë private me ngjyrën e verdhë ose me ngjyrë, ose kombinim të ngjyrave të njëjta me atë të autoveturave në shërbimin taksi në bashkinë qendër rrethi.”.

5. Pas pikës 9/1 shtohet pika 9/2 me përmbajtje si vijon më poshtë:

“9/2 Në ndryshim nga shkronja “ç” pika 9/1, nga tjetërsimi i ngjyrës do të përjashtohen të gjitha autoveturat në përdorimin privat, kur ngjyra e verdhë është ngjyra origjinale e autoveturës nga prodhuesi.”.

Neni 2

Pika 2 e kapitullit VI riformulohet si vijon më poshtë:

“2. Tarifat e transportit të udhëtarëve qytetës, ndër-qytetës dhe rrethqytetës me autobus janë ato të miratuara me vendim të Këshillit të Ministrave nr.146, datë 26.2.1998 “Për ndryshimin e tarifave të transportit të udhëtarëve”, të ndryshuar.”.

Neni 3

Aneksi 3 riformulohet sipas aneksit bashkëlidhur këtij udhëzimi.

Neni 4

Dispozita kalimtare

1. Bashkitë jo-qendër rrethi/komuna do të licencojnë subjekte në shërbimin taksi, si dhe kontrolli teknik i kryer nga subjekti i autorizuar nga Ministria e Punëve Publike dhe Transportit dhe Komisioni i DPSHTRR-së në plotësimin e kushteve të komoditetit dhe të veçanta do të kryejnë veprime, nëse autoveturat në shërbimin taksi në bashkitë jo-qendër rrethi/komuna kanë ngjyrë të verdhë ose ngjyrën, ose kombinimin e ngjyrave të njëjta me autoveturat në shërbimin taksi bashki qendër rrethi të të njëjtit rreth deri në ditën e botimit në Fletoren Zyrtare të këtij udhëzimi.

2. Drejtoria e Përgjithshme e Shërbimeve të Transportit Rrugor merr të gjitha masat e nevojshme që të njoftojë të gjithë personat fizikë që zotërojnë autovetura private që, duke filluar nga data e hyrjes në fuqi të këtij udhëzimi, të mos tjetërsojnë ngjyrën e autoveturës duke bërë të verdhë ose ngjyrë, ose kombinim të ngjyrave të njëjta me atë të autoveturave në shërbimin taksi të bashkive qendër rrethi.

3. Brenda 12 muajve nga dita e hyrjes në fuqi të këtij udhëzimi, zotëruesit e autoveturave në

përdorimin privat, me përjashtim të atyre të pikës 9/2, të cilat janë të bojatisura me ngjyrën e verdhë ose me ngjyrë, ose kombinim të ngjyrave të njëjta me atë të autoveturave në shërbimin taksi në bashkinë qendër rrethi, do të tjetërsojnë ngjyrën e autoveturave të tyre.

4. Bashkitë qendër rrethi jo-qendër rrethi e komuna bashkëpunojnë nga afër me organet përgjegjëse, si Drejtorinë e Përgjithshme të Shërbimeve të Transportit Rrugor, subjektin e autorizuar për kryerjen e kontrollit teknik nga Ministria e Punëve Publike dhe Transportit, Policinë Rrugore, Policinë Bashkiake dhe Policinë Tatimore në zbatimin e këtij udhëzimi.”.

Neni 5

Ky udhëzim do të hyjë në fuqi me botimin në Fletoren Zyrtare.

MINISTRI I PUNËVE PUBLIKE DHE TRANSPORTIT
Sokol Olldashi



REPUBLIKA E SHQIPËRISË
MINISTRIA E PUNËVE PUBLIKE DHE TRANSPORTIT
DREJTORIA E POLITIKAVE TË TRANSPORTIT RRUGOR

AKT VLERËSIMI
NË PLOTËSIMIN E KUSHTEVE TË KOMODITETIT DHE TË VEÇANTA TË AUTOVETURËS
NË SHËRBIMIN TAKSI

Lëshuar në zbatim të udhëzimit nr.1649, datë 16.8.1999 “Mbi plotësimin e disa kushteve të veçanta në transportin rrugor të udhëtarëve”, të ndryshuar, kapitulli IV, komisioni i ngritur për kontrollin e plotësimit të kushteve të komoditetit dhe të veçanta në shërbimin taksi, kontrolloi autoveturën në shërbimin taksi.

Targa.....
.....
Marka.....
.....
Tipi.....
.....
Nr.shasisë.....
.....
Viti..... i
prodhimit.....
.....
Nr. i
vendeve.....
.....
Numri i lejes së
qarkullimit.....
Emri i subjektit
transportues.....
Adresa e plotë e
subjektit.....
Me seli në njësinë e qeverisjes vendore,
bashkia/komuna.....
Stema e njësisë së qeverisjes
vendore.....
Tarifat e
shërbimit.....
Ngjyra në përputhje me vendimin e njësisë së qeverisjes
vendore.....

dhe pasi verifikoi të gjithë dokumentacionin e nevojshëm në përmbushjen e kërkesave të komoditetit e të veçanta që kërkon udhëzimi,

Komisioni vlerësoi:

Se autovetura e mësipërme plotëson kërkesat për shërbimin taksi të udhëtarëve sipas kapitullit IV të udhëzimit nr.1649, datë 16.8.1999 “Mbi plotësimin e disa kushteve të veçanta në transportin rrugor të udhëtarëve”, të ndryshuar.

KOMISIONI

(Emri, mbiemri, firma)

(Emri, mbiemri, firma)

(Emri, mbiemri, firma)

(Emri, mbiemri, firma)

KRYETARI

(Emri, mbiemri, firma)

Lëshuar, më _____ i vlefshëm deri _____

Shënim. Ky dokument mbahet në mjet, në origjinal.